

Ekskusanan no ta Solushoná

E situashon ku kabes di Kolegio Luis Beltran na Rincon, a trese dilanti siman pasá ta alarmante. Jerome Lo A Njoe a deskribí e situashon sosial manera e ta enfrent'é diariamente. MUCHANAN DI SKOL BASIKO ta mete den droga. Tin "interes, problemanan i aktividat seksual serka e muchanan, kantidat grandi di kasonan di insèst, práktika na gran eskala di aborto." E tambe ta revelá ku mama i tata di un gran kantidat di mucha no ta huntu. Lo A Njoe ta kalkulá ku di kada dies kas, shete tin problema sosial.

Kiku ta e fuente di e problemanan aki? Lo A Njoe ta mustra riba diferente kousa, entre otro, falta di polis den bario di Rincon, miramentu di televishon pa loko, mayornan hóben sin eksperensia di bida, ku no a haña un bon ehèmpel serka nan mayornan, mayornan di Rincon ta traha muchu leu di kas, èts.

Tur esakinan sin duda ta hunga un ròl den e dekadensia di e komunidad aki, Ma sin duda un faktor ta destaká: e abandóna di Dios Su reglanan di étika.

Nos por kamuflá nos rechaso di moralidat ku diferente ekskusa. Ma esei no por skonde e echu ku nos ta ignorá, trosé, i bandoná étika pa nos por haña nos gana. Beibel a avisá nos ku "Tin un kamina ku ta parse bon pa un hende, ma su fin ta e kamina di morto" (Proverbionan 14:12). Nos a skohe e kamina aki tòg.

Tuma e siguiente argumento popular komo ehèmpel. "Nos ta biba den un era moderno i mester adaptá nos na un sistema nobo. Nos no mester keda mará na e sistema antikuá di moralidat. Esaki ta aña 1995, no historia antigwo! Ku teknologia, invenshonnan, i remedinan moderno, nos mester por gosa mas libertat ku tabata e kaso den pasado!"

Palabranan bunita, rasonabel, konvensiente—pero eronio!

Sin duda e argumento ei mes ta antigwo. Kada generashon por argumentá ku nan ta biba den un era moderno i pues mester tin mas libertat. Ta bèrdat ku aña 1995 ta e era mas moderno ku a yega di eksistí. Ma esei tambe tabata e kaso na aña 1995 B.C. Si bo ta sigui e rasonamentu ei, kada era mester deshasí di étika pasobra e ta un era moderno. Ta notabel ku hende awendia ta rebeldiá kontra presis e mésun étika kontra kua hende a rebeldiá miles di aña pasá! Etika no a kambia! Ta un mentira ku e era mester determiná nos normanan i balornan!

Algun ta mustra riba teknologia moderno, bisando ku esei ta hustifiká e abandóna di normanan antigwo. Ma realidat ta indiká ku hende solamente por redusí, suavisá, òf deshasí di e KONSEKUENSIANAN FISIKO di piká, no e konsekuensianan sikológiko, spiritual, emoshonal, èts. E argumento ei ta mes ridíkulo ku un mucha ku ta rasoná ku no ta malu pa e desobedesé su mayornan, basta ku e ta bisti dos karson pa suavisá e sota. Di mésun manera nos ta rasoná ku sèks fuera di matrimonio no ta piká, basta ku ta kubri e órgano seksual ku u kondom. Apsurdo! Dios Su leinan di moralidat ta na vigor si nos por evitá e konsekuensianan si òf nò!

Ademas, nos rasonamentu ta inkonstante. Riba siértu punto nos ta konvensé ku Dios Su leinan no ta kambia. Por ehèmpel, e lei di gravedat. Ora bo ta tira un piedra na laira, e forsa di gravedat ta sòru ku e ta kai bek na tera. E lei aki tabata na vigor pa bo tata, welo, i tur di bo antepasadonan. Ningun di nos ta asina loko pa kere ku tabatin un tempu den pasado ku un piedra lo a sigui bai haltu i nunca kai bek na tera ora bo ta tir'é na laira. Pakiku anto nos ta rasoná ku Dios Su leinan moral si mester kambia? Dor di e siglonan, Dios Su leinan moral no ta kambia. Hesus tabata enfátiko: "Shelu i tera lo pasa, ma Mi palabranan lo no pasa di ningun manera" (Mateo 24:35). E salmista a deklará, "Pa semper, O SEÑOR, Bo palabra ta stablesí den shelu (Salmo 119:89).

Si nos ke mira un kambio den nos komunidad, kada un di nos mester deshasí di TUR nos ekskusanan i OBEDESE e étika ku Dios a preskribí den Beibel, i respekto di loke otro hende ta bisa! Siguiendo e normanan i balornan aki ku a ser probá di ta korekto dor di tur e siglonan, ku tempu nos lo logra sali for di e situashon desesperá ku nos ta haña nos aden. Ma tanten ku nos ta sigui buska ekskusa pa nos por gosa e "verboden vruchten" nos ta kondená pa sigui eksperensia e trastorno sosial ku Jerome Lo A Njoe a deskribí.